

IPA a celebra apertura oficial di aña academico 2009-2010

ORANJESTAD--Instituto Pedagogico Arubano (IPA) recientemente a celebra apertura oficial di aña academico 2009-2010.

E apertura di e aña academico a marca e comienzo oficial caminda a presenta e plannan y ambicion di e instituto pa e aña nobo y tambe a refleciconar riba e aña academico cu tras di lomba. Durante e apertura di aña academico directora general sra. Drs. Ava Thodé a presenta e tema di aña di e instituto.

IPA a scohe como tema di e aña academico 2009-2010 pa "Evidence – based

communities of practice", un comunidad of grupo cu ta practica a base di evidencia y conocimiento. Pa e ocasion special aki y pa elabora mas riba e tema di aña IPA tabata tin como invitado internacional profesor dr. Lewis Gordon, cu a fungi como e key-note speaker di e apertura oficial. Profesor Lewis Gordon ta profesor di filosofia na Temple University, Philadelphia, Estadonan Uni. Profesor Gordon tin un experiencia academico amplio como profesor y a scirbi varios buki y articulo scientifico. E areanan di specialisacion di profesor Gordon ta entre otro filosofia di education y cultura, y filosofia social y politico. Durante e anochi di apertura oficial di aña academico 2009-2010 a haci entrega di certificado na studiantenan cu a finalisa un fase di estudio cu exito. Ta trata aki di studiantenan cu a logra e fase di Propedeuse, esta e prome



aña y tambe studiantenan cu a logra termina e fase integrativo di e estudio. Directora adhunto di departamento di estudionan inicial, sra. Drs. Marylin Richardson a haci e entrega di certificado di Propedeuse na 39 estudiante di diferente estudio y 24 certificado di fase integrativo.

Un parti di e anochi tabata dedica pa honra e hubilarionan di IPA y presenta e coleganan nobo. E aña aki IPA tin diferente colega cu a hasi sea 5, 10, 15, of hasta 25 aña trahando incansabel pa IPA, entre nan e directora general sra. Ava Thodé (15 aña) y directora adjunto sra. Ingrid Kuiperdal (25 aña). Un honor special a bai pa sra. Ingrid Gietel cu a cumpli 30 aña den servicio di gobierno.

Un tradicion di tur aña na IPA ta e eleccion di docente di aña cu ta elegi pa studiantenan y colega docente di IPA. E aña aki tambe a opta pa e tradicion ey y Docente di Aña 2008-2009 a keda den persona di Cheryda Gemin, docente di Hulandes, cu segun su studiantenan y coleganan docente ta e maestro mas ehemplar y inovativo di aña

2008-2009. Colega di aña a keda den persona di sra. Greta Nicolaas, directie secretaresse di IPA, cu ta wordo considera un colega ehemplar y semper cla pa yuda.

E anochi tambe a conoce varios sorpresa. Un di e sorpresanan tabata e presentacion y entrega di un serie di 7 buki na Papiamento, produci y publica cu financiamiento di Fondo Desaroyo Aruba (FDA). Sra. Joyce Pereira y sra. Swinda Schwengle a presenta e serie di buki y a haci entrega di e bukinan na sra. Ava Thodé y sra. Ingrid Gietel.

Mas ainda, a haci presentacion inoficial di e areanan nobo di e instituto. IPA a dedica e areanan nobo y renoba na tres dama cu a traha incansabel pa IPA y pa enseñansa en general. Ta trata aki di sra. Maybeline Arends – Croes, sra. Nita Semerel q.e.p.d., y sra. Madonna Stephens. Na e manera aki IPA kier honra e gran esfuerso y trabou cu e damanan aki a hasi pa IPA y

pa enseñansa na Aruba. Awe IPA conoce Plaza Maybeline Arends – Croes, Café Nita, y Onderwijs werkplaats Madonna Stephens. Parti di e presentacion di e areanan renoba tabata e desvelamento di e plakaatnan na nomber di e tres damanan homenagea.

A clausura e anochi na un manera festivo cu un presentacion musical di e banda OREO. "Na e manera aki IPA kier a duna e celebracion mereci na nos graduadonan di 2008-2009 cu pa motibo di blackout durante e ceremonia di graduacion na comienso di Juli no por a sigi. IPA ta gradici tur estudiante, docente, personal di sosten y invitado cu tabata presente riba e anochi aki y forma parti di e apertura oficial di aña academico di e instituto.

IPA ta spera cu e aña academico aki por ta uno yena di logro y positivismo y ta desea e comunidad completo di IPA y enseñansa en general hopi exito den aña academico 2009-2010," James van der Linde, encarga cu e proceso di calidad y relacion publico di IPA a bisa.